

Il patriarcje de pàs: Marquart di Randeck

Ogni mès, chest an, prin dal Congrès Eucaristic, che al à par titul "Eucaristie e comunitât locâl", si cjatin culi par ricuardâ un personaç de nestre Glesie locâl di Aquilee che e je la mari tant de diocesi di Udin e che di chê di Gurize.

Usgnot o ricuardin un gran patriarcje di esatementri sîscent agns indaûr, dal 1366 al 1382, Marquart di Randeck.

Al vâl la pene ricuardâlu intun moment come chel di cumò in Italie e in Friûl, parcè che nô lu ricuardin usgnot no dome come patriarcje, ma ancje come chel che al à capît che al covente, par cualuncue popul, che lis leçs a sedin claris, ben fatis, che a tirin vie il pît sul cuel di ducj chei che si sintin di jessi cjalcjâts di chei altris.

Marquart di Randeck al è chel che al à fat, cu la colaborazion di tancj di chenti, lis "Constitutiones Patriae Forii Julii", al vignarès a stâi il codiç dal Friûl che al à durât fintremai tal 1797.

No je une robe di pòc. E je une robe pardabon impuartante la lec, chê umane, chê che o fasìn nô; - Diu la sò lec le à fate ben - e i oms di solit no discutin chê di Diu, a discutin chê dai oms. La leç dai oms e à di jessi fate no par comandâ, no par tignî sot, ma parcè che chel che nol à fuarce le vebi.

La leç civîl e à di servî propit par chel che nol à fuarce, parcè che chel che al à fuarce di bessôl si difint di bessôl.

La leç e varès di jessi il jutori, la protezion e la salvece dal puar. Po ben, no si pues dî che propite al sedi simpri cussì. E, in particolâr tai nestris timps di cumò, si devi dî che cheste idee no va dismenteade.

No crôt che e sedi une robe che no va dite in glesie cheste, parcè che mi pâr che, in zornade di vuê, al sedi cualchidun che al va ator fevelant talmentri ben de dutrine di Crist che al volarès che e fos sore dai nûi e no te vite concrete de int.

* * *

Al è vêr che il Cristianisim no si confront cun nissun, cun nissun codiç: no dome chei civîi, ma nancje chel gleseastic.

Il Cristianisim nol sta nancje tes leçs de Glesie, al è plui grant, al è plui larc.

Dacuardi duncje che no si pues predicjâ l'amôr di Diu e la sperance, no si pues predicjâ la fede e la veretât cence jessi cui pîts par tiere. Cussì o dîs: se il Congrès Eucaristic a àn di fâlu chi a Udin cul titul "Eucaristie e comunitât locâl", une Eucaristie che ves di jessi talmentri par aiar di dismenteâ la situazion nestre, dal nestri popul, e riscje di fâ plui mâl che ben.

Il nestri popul si cjate intune reâl e concrete cundizion. Ma par dî ciertis robis al coventarà riscjâ: se no si riscje, no si è dissepui di Crist. Ancje Crist al à riscjât; al à riscjât di no fâsi capî ancje dai siei dissepui.

Po ben, te nestre storie o podin puartâ fûr un patriarcje come Marquart che, rivât in Friûl, al à cjatât une vuere su trê fronts. Propit in chel secul, i nobii furlans si jerin dividûts: un al jere pal re di Ongjarie, che al stave jentrant pal Lusing; chel altri al jere pal duce di Austrie, che al veve poiadis lis sgrifis sù fin a Vencon; e une vore di altris a jerin par Vignesie che e molave il mâr par slargjâsi su la tiere.

Cuant che al è rivât chenti, juste ai 19 di Avrîl dal 1366, tal domo di Cividât i àn regalade une spade. E lui la spade le à cjapade e le à metude tal sfodri, parcè che chel che si fide de lec nol crôt ae spade. Chel che al crôt che i oms a vebin ancjemò tant sintiment di fidâsi di une leç che, se no je ben fate, e cîr di diventâ simpri miôr e di gambiâsi e miorâsi continuementri, chel al cjape la spade e la met tal sfodri.

E je cheste cerimonie che si ripet ancjemò ogni an la dì de Pifanie. Ma le àn strambide: a dan la benedizion cu la spade. No! Marquart le à cjapade e le à metude tal sfodri. Al è

propit il patriarcje de pâs.

* * *

Se o viodês, ancje in zornade di vuê nol è migo cuissà ce diferent! Ce tante de nestre int che forsit e à cualchi podê - se nol è simpri il podê politic al pues jessi chel de culumie o ancje chel de culture - invezit di produsi la pâs chenti, di produsi la culture, il benstâ culì, a saborin pal benstâ di ca, di là, di sù, di jù e cuasi si dismentein dal ben dal popul di chenti.

Jo no pues fâ nons; ce che o stoi disint al va sul cjâf di ducj. Ma al è sigûr che la pâs, la pâs plene di oparis che lu sburte a fâ lis leçs dal popul che al governe, al è il significât di Marquart ancje pe int di vuê.

Mi auguri chest: che il Congrès Eucaristic nol vedi di restâ par aiar; che al vedi di vignî jù, che al vedi di dî alc di concret a di cheste int. ...

E stant che o sin un popul dulà che, tal cors de storie, comprendude chê dal 1300, la culture e lis fuarcis de Europe di raze diferent, gjermaniche, sclave e ladine, si son simpri scontradis e dulà che la pâs e je tant dificil di mantignîle, mi auguri che chest nestri popul al vedi di capî che al è fi di chel scontrâsi di popui e che al à di jessi bon di judâ chescj popui, cun dutis lis lôr manieris di vivi, a capîsi.

Setemane passade a Aquilee e je stade une messone: dome une volte in mil agns - al diseve malinementri il plevan di Aquilee - dite insieme dai vescui de vecje provincie gleseastiche di Aquilee, di Augsburg fintremai a Corno e a Zagabrie: un segn di unitât in non di Crist e di Aquilee.

Nô o sin un popul dulà che i popui si incuintrin e un nol va sore chel altri.

Che Diu nus dei la fuarce di podê jessi un popul di pâs, un popul dulà che i scuintris si bonin, dulà che lis barufis si calmin, dulà che si è bogns di difindi il puar cence fuarce, simpri.

O disarês: nol baste dîlu, bisugne metilu in pratiche. Ma almancul scomencin a dîsal!

Udin, 29-4-72 (Madone di Gracie)